

四庫全書

集部

欽定四庫全書

集部

范忠宣集卷一至三

詳校官庶吉士臣龍廷槐

檢討臣何思鈞覆勘

總校官中書臣朱鈐

校對官中書臣潘庭筠

謄錄監生臣李崇實

欽定四庫全書

集部三

范忠宣集

別集類二宋

提要

臣等謹案范忠宣集十八卷奏議二卷遺文一卷補編一卷宋范純仁撰純仁字堯夫仲淹次子元祐間官尚書右僕射以黨禍貶永州召為觀文殿大學士贈開府儀同三司其謀國忠愷殊有父風事迹具載宋史本傳文集

凡十八卷前五卷為詩後十二卷皆禋文其末卷為國史本傳則純仁再從孫之柔于刊集時所附入也前有嘉定五年樓鑰序後有之柔及知永州沈圻廖視永州教授陳宗衡四跋鑰稱其文根柢六經切于論事蓋其氣體本自深厚固不徒以人重耳又奏議二卷自治平元年為殿中侍御史至元祐八年再相前後所奏封事凡七十三首又遺文一卷

載純仁文七首附以其弟純禮文二首純粹
文十九首乃裔孫能濬據舊本重加刪補者
又補編一卷載純仁尺牘一首附以制詞題
跋等十二首亦能濬所編訂康熙丁亥其二
十世孫時崇與仲淹集合刻行之其書錄解
題所載純仁言行錄二十卷在宋世已佚又
彈事五卷國論五卷今亦不傳矣乾隆四十
三年五月恭校上

總纂官

臣紀昀臣陸錫熊臣孫士毅

總校官臣陸費墀

范忠宣集原序

惟昔賢者皆後世之師表而學者之慕古人則自各有不同如汲黯之慕爰盎司馬長卿之慕藺相如若有不
可解於心者本朝先正名德相繼如泰山喬嶽景星鳳
凰事近而易考嘉言善行皆當取則而區區之愚少而
讀元祐丞相忠宣范公言行錄反復終始正學大節偉
識宏度贊歎不足於諸鉅公間尤願執鞭欲追逐其萬
一而不可得也如奏議國論等書如責人責己助廉成

德之訓又若避好名之嫌則無為善之路等語皆當終身誦之每恨未見其家集也嘉定五年三月甲戌公之從元孫中書舍人之柔見過謂鑰曰忠宣文集未行於世晚而謫居永州三年邦人至今懷仰比因沈史君圻赴郡以家藏本屬之既已刊就而舊無序引徑以見委鑰謹謝之且曰託名不腐豈非晚進之幸豈非平日之願顧年衰學落何足以與此三辭不獲則取而伏讀越兩日而盡得之蓋公天資誠確篤志學問承文正公之

親傳博之以泰山孫明復徂徠石守道盱江李泰伯三
先生師友之益發為詞章根柢六經切於論事無一長
語而一出於正文忠蘇公序文正公集有曰其於仁義
禮樂忠信孝弟如饑渴之於飲食欲須臾忘而不可得
又曰雖弄翰戲語率然而作必歸於此故天下信其誠
爭師尊之公真是似者哉而鑰之所尊敬者此又其餘
事自其立朝出鎮廟謨相業具載史冊不待贅言惟公
本於忠恕得二者之功用深入吾夫子閭域非淺丈夫

所能窺者溫恭惟謹無異稠人遇有當為勇決過於資
育此其大過人者然亦尚可勉也心平而寬慮周而遠
喜怒哀樂所發而必中克伐怨欲不止於不行包含太
虛無所適莫姑以其見於外者一二言之鄧綰嘗奏罷
公襄州及言者攻綰則極力爭之謂已經先朝責降不
應再有所貶公亦非有意於以德報怨自謂上惜朝廷
事體下以安人情反側蘇黃門誦楊畏彈章而公去相
位它日哲宗面斥黃門從容為解黃門謂公為佛地位

中人章子厚得罪父年九十議與一便郡公言當置往咎而念其親公本以議新法不合而去及溫公將盡改熙豐之法公謂特當去其太甚又須徐徐經理差役一事尤不可暴操心類如此公既喪明而責知隨州尋竄永州蓋子厚必欲寘之死地而公素安義命無一語怨之家人猶未平也風雨中覆舟於江以救僅免拭面而語家人曰此亦子厚所為邪嗚呼使之從夫子於陳蔡當亦有不客何病之言此非他人所及也蔡新州負罪

至重公力救之上忤簾中下違同列賢如劉元城亦以
吳處厚為義存君親詆公不遺餘力公不為動卒貫其
死一時不以為快及事之變呂汲公劉忠肅等雖終於
貶所其得免於已甚者始知公之不寘新州於死之力
也汲公輩初竄嶺表郊赦未頒先謂難從恩宥公齋戒
言大防等年老疾病何以自存迹其所罪亦因持心失
恕好惡任情以異已為怨讎以疑似為訕謗誤國害公
覆車可鑒此不惟啓寤泰陵正欲感動子厚輩使之輩

心而從厚也嗚呼自熙豐元祐以至元符紹聖之間世事屢變翻覆非一徽皇踐阼改元建中靖國流人悉歸四海望太平於朝莫欽聖憲肅皇后與徽皇待公而為政至遣中使遠至湖外好賜牽復迎勞不絕公時在瞽癢風痺中知上果用我亦欲感激自奮而病不可為矣嗚呼天乎倘延以三數年之壽使再得政則必能調一天下可以仰副建中靖國之意豈復有後日之禍哉公既去矣而蔡呂俱召呂又為蔡所排而任蔡愈專矣此

所以撫卷長懷而繼之以太息流涕也後之君子欲多識前言往行以蓄其德者於此書可不熟復而力行之以代弦韋之佩乎文正四子長監簿以病早沒忠宣與二季俱顯衣冠蟬聯然自忠宣以來一百二十有四年而後中書舍人始紹世科實監簿之元孫范氏之興未艾也四月丁丑朔正奉大夫參知政事兼太子賓客四明樓鑰謹序

欽定四庫全書

范忠宣集卷一

宋 范純仁 撰

古賦

秋風吹汝水賦

時作襄城宰汝州太守席上賦

歲作噩之窮秋兮，策羸驂而獨征。嗟旅懷之羈憤兮，感時律之崢嶸。導汝流之縈紆兮，背嵩峯之翠橫。號霜風之僚慄兮，肅天地而淒清。獵葭葦于晚岸兮，雜紅翠之搖旌。脫林實於沙際兮，浮瑣碎之秀瑩。激回流之平迴

兮蹙綃文之細輕涵夕照之演漾兮蕩澄潭之空明促
東逝之滔滔兮方感慨於余行縻王事以去留兮蹟未
安而遽更佩主人之眷勤兮服友生之意誠何會合之
難久兮特離憂之易并儻丘園之可服兮將就濯其塵
纓臻聖賢以相期兮惟道義之是營苟沒身以無愧兮
亦奚事於成名

喜雪賦

余謫守於山城兮唯土瘠而民窮加農事之鹵莽兮仰

雨暘之適中昧豐凶之迭有兮蓋天道猶張弓雖唐商
之盛兮亦難恃乎全功賴睿明之在上兮常十雨而五
風偶愆陽之微疹兮候甫涉乎季冬既四聽之旁達兮
復親覽乎奏封詔禱祠於羣望兮戒守牧以綢繆邁成
湯之憂民兮軫淵衷而有忭宜小臣之承命兮增惕懼
而虔恭豈人子之失職兮煩慈父而尸饗走名山以展
祀兮忘崖巖而谷穹致帝命之丁寧兮爰震起乎蟄龍
矧聖人之先天兮固天心之所同降嘉雪於八紘兮與

和氣而並充唯駿德之昭格兮方有變乎時雍寧止瑞
于一朝兮穫麥黍之芄芄民既富而後教兮將神化之
日隆當刑清而訟息兮士得委蛇而自公嗟一人之餘
慶兮資億兆以何豐

古詩

北遊寄崔象之

塵埃都門路羸馬復北首徘徊孤客心厭此行役久秋
雲結層陰風葉下高柳解鞍止孤館斜雨入戶牖愁懷

寫長川時運付杯酒回念宇宙間無一真我有功名聖
賢事世味俗自厚行心弗愧天安俟傳不朽偶為細故
牽還成浪奔走矧庇吾族繁折腰仰五斗營營百年內
此累難遽否田廬儻其完尚可歸老醜人事固莫定此
志誠不苟誦言成短章聊以告吾友

寄謝師直

去夏謁君時踏雨澱川路癯然泣相弔心苦別亦遽窮
愁但急急崢嶸歲還暮羈旅念友朋天寒感霜露孤懷

雜離憂紛亂疇可訴計我之官期迨君祥琴御邑館臨
通途車馬當迎還言笑釋所願此喜良可預欲致情抱
勤音書豈能叙

陳東父示及新文

世德鍾良士爽氣橫清秋公才輔經術文價伏時流近
從計廷召暫為梁苑遊京都利名地趨謁先公侯高情
遠俗尚壯麗資冥摻清尊破旅顏黃菊迎歸舟佳藻盈
大軸遺我蠲窮愁正聲和羣心明珠炫雙眸詞高不可

繼惠重終可酬愧君樂善懷行義愚當修

休心亭

吾友明知士結廬汝水邊名亭號休心休心師昔賢將
期一寸誠悠久如青天我聞人最靈至性初純全吉凶
以情變善惡緣習遷湍水決其防放蕩無由還所以古
聖師三絕窮韋編曾子善守約孟軻養浩然皆能保誠
明千載光華傳夫君真其徒墳史尤精研恬然安粹靈
外慮何由牽進退固有道用舍豈必專立疾不俟禱顏

樂無窮年寧同避俗者身迹空拘攣

累約舍弟純禮以職事未至

落葉猶同飛寒鳥猶竝枝我汝獨何負不得長相隨偶
為細累拘跬步成天涯後日更遠適會合信難期尚願
家國寧且作千日離悠悠百年間幾別顏即衰從宦非
我志功名徒自欺誰言千寸祿坐使手足違逐末背本
心得一萬已遺我汝粗有識此事良同悲安得長洲田
清水稻百畦將汝入故廬親戚坐成圍幼弟就文史長

兄近砭鑿孝謹奉諸宗祭祀潔四時此外逐風月對酌
白酒卮畢世為善人不負生育慈斯志儻未遂終為路
人嗤

會師宰

憶昨相逢際風喧洛城春芳菲供愁眼衣袂偕京塵艱
難各之適會合寧逡巡君歸來何時我約赴無因

嘗許
往謁

師厚自此還相望渴臆生埃氛晚歲留故丘山村寂無隣
落日送樵牧蒼烟起荆榛李弟自城至開顏慰天倫遽

言長者車相過止來晨茲遇出意表俟迎屢冠巾寒途
馬歷歷幽扉犬狺狺野夫競走報似能喜佳賓空堂揖
顏色和氣相氤氲開尊共燈燭笑語何諄諄朝遊禹門
寺暮歷清伊濱危龕儼金像遠波舒翠鱗石樓最清絕
就宿同稠茵灘聲夜逾急天然謝韶鈞閒淡盡物理至
樂還天真人生足羈束此會尤難頻所期道義心白首
長相親

久雨

季夏德陽盛炎赫恢洪鑪俄然積陰來直掩造化樞蒸
雲滿乾坤澍雨傾江湖晝夜不停灑動植寧得蘇深虞
墊地軸遂恐沈日車火官弛權綱朱鳥憂沾濡薰風阜
民物反逢怒飈驅川盈浩無津龍卧埋深淤晦霧擁城
門驚瀾起康衢雖經禹力勤尚畏赤子魚叢蘭委泥滓
祥木掩蒿蕪罅漏生廣廈浸淫矧吾廬澀蘚上明鏡蠹
腐盈縑書牆茨漸衣繡網蟲競纓珠螺蚓恣緣繞蛙黽
爭謹呼幽人志自苦陰處情難舒憂顏詎安席避溺思

乘桴安得赤帝悟却使政令敷盡屏沴侵昏大明升震
隅六合仰清光九州免淪胥四序各有主一物長歡娛

道旁柵

鱗鱗田邊柵意欲全嘉禾不念大道隳輪蹄苦難過還
來踐旁畝害稼良愈多願以樹柵心治道夸險坡行子
得坦途羈旅遠詆訶芄芄滿隴翠誰冒蹊田科

游漢川石橋

英山富泉石翠巖映清漣近可杖屨及寂無市井喧良

辰惜虛過幽尋忍空還幸接鴻鴈序愧在驂騑前一徑
入嵐靄遍野皆蘭茝洗耳慕潁曲散髮非伊川芳意動
宿楚暖脈通幽泉遙源發何所積流浩成淵斷岸矗蒼
壁澄瀛印晴天人稀名有約村遠魚無筌初開臘甕酒
乍減春衣絲風光入雩詠暄和臨禁煙柔莎當茵席輕
漪泛觥船天日正清潤水雲共澄鮮靈苗恣采擷古跡
皆窮研高會屏紛雜野具無葷羶繁英落如糝幽禽語
如絃嫩香小杏肥深碧新荷圓游鯈忽上下戲蝶時翩

翺芳樹蔭坐釣平石醒醉眠共得真隱趣勿為豪華傳
滿目是圖畫在處皆潺湲春風拂歸袂暮景生吟鞭恨
不見山月月月曉山南邊

暑雨

暑候積隆曠驕陽變重陰朱靈弛網權蒸鬱資霖淫驚
聲遞洶洶密脚羅森森階除垂玉雷朝暮無停音修虹
掛明帶奔雲仆危岑雷電收震耀曦光久潛沈老火不
復炎淒飈迓柔金大道瀉溪壑窮巷多汗涔朝泥浣羸

履夜氣凌疎衾腐耳帖朱檻美實墮青林蛙黽生意氣
螻蚓相謳吟嘉穀失耘耨坐忍萊莠侵白屋生罅漏工
女停機絃庭圃亦蕪蔓誰能辨藁芥長夏方長養漸漬
所不禁伊予抱最靈咨戚何由惜安得排九閭感激露
至忱訴帝求陽明咄嗟破凝靄薰風阜萬物復將歌舜
琴天高不可達耿耿徒此心

寄友人

時君養多士本欲康生民服章與奉祿豈但榮其身士

昔志於學寧曰利欲親得位以行道修己將安人夫君
青雲姿文行尤彬彬明主親選士往作諸侯賓茲義雅
所尚有懷竝松筠當令千載間炯炯尊儒紳

謁辛化光

濃陰結秋意疎林嘯松聲時節感壯懷挈酒慰友生友
生冰玉士節行映古清十五簪儒冠四十無華纓家貧
道彌富身困譽益榮殷勤數賓侶足趨顏巷輕高齋面
幽圃修筠擁軒盈班班寒露叢竟吐籬下英食具簡且

潔盤蔬亦晶明飲適言笑和至樂不亂情郁然蘭芷芬
薰灼通心誠因嗟朝市間利欲空自兵

留別洛中諸友

少孤多旅遊解驂幸吾里親友皆賢豪相逢有餘喜世
事如浮雲離合寧暫止酒罷予其東幽蹤逐伊水

同成都尹吳仲庶運判韓持正會飲

宦遊鮮寧居未定即奔走踰年官岷峨較昔已云久所
喜風物繁聯職多舊友平生道義心相期各白首公餘

事招尋談笑共尊酒時方積雨歇涼氣生戶牖紅藥照
平池蒼烟羃高柳清歡正蕭散離思已紛糾後遇復何
鄉此樂能再不念初撫遐氓力薄顏亦厚飽歷風波危
僅脫虎狼口何當掛塵冠杖屨醉林藪俯仰適所願榮
利亦何有世故浩難必逍遙慕莊叟

寄趙大觀度支

上天生賢傑有意康斯民六十不大用徒勞何足云堂
堂趙夫子德與往哲隣嘗冠獬豸冠血面嬰龍鱗身輕

秋葉危大典虞湮淪予時忝同僚附驥願亦伸自爾均
出處荏苒十四春不肖罷蜀使迂謬衆所矚君獨憐其
心撫勞意益親特枉廉按車再宿驂行塵愧無管氏才
蒙此鮑叔仁蒼皇摻袂去分老江湖濱前年易邊麾揖
君東都門君方領部使迎遇謂可頻不作旬浹別各走
西征輪前後數舍間音旨徒相聞到官但引領莫覲綦
與巾道大果難合稅冕寧逡巡投効勇自丐就養歸丘
樊君志固為得我懷誰與論命駕適千里茲義古所敦

有守念繫匏空望南山雲

秋意

日躔回南陸炎氣徹厚地鬱蒸堆火雲飄雨良快意閤
穴蟪蛄鳴濕翼玄蟬墜潛陰生早涼煬暑不得熾羈懷
感時節撫事增愁思倦遊老將至歸興勞夢寐

題楊希元朝議南軒

卜居俯澗瀝開軒面嵩洛迴占西都勝高據北邙脚千
門凝紫烟羣峯參碧落神臬勢回抱天闕誰開鑿朝陽

麗金碧半空橫殿閣灘聲夜潺湲雲氣暮慘錯春花敷
爛錦夏木成翠幄三川披畫圖八極開絳幕曾無登涉
勤坐享仁智樂主人富才識大隱當城郭早解郡印還
勇脫官檢縛清心對萬景真趣絕外鑠可笑學神仙妄
意向寥廓

和子駿

夏木擁高陰微風蕩輕靄開軒延衆賓置榻臨爽塏清
談析妙理塵臆滌煩痼至樂從中來外物亦何待頻登

君子堂道義庶無餒

王安之朝議蛙樂軒

羣響本無異悲歎由感懷蛙鳴得其所人樂與之偕既
泯物我念寧煩絲竹諧誰能同此適應亦少朋儕

和君實病中子駿招不至

君子固無患雖有亦何病公偶無妄疾居養仁者靜懷
賢本心服非由譽望盛庶以德義風化此愚蒙性欣陪
杖屨遊晨夕不為併暫阻如三秋斯言猶未稱屢訶期

勿藥敢怠走門徑

君實南園飲罷留宿二首

間從長者車名園宴初闌佳賓薄暮散歸鞍帶明月珠
玉良有德芝蘭香不絕夜久卧北窻魂夢亦清潔
繁花錦鬪鮮好鳥歌無闕逍遙涉其間豈獨娛歲月修
竹色常佳清渠流不絕客散掩幽扉圓蟾正明潔

次韻景仁寄君實決樂議之作

餘生苦多難所向招詆譌前年失二子悲腸劇剜劖悽

魂念職守憂患何瀰漫叫閤輒自陳聞者為辛酸朝恩
俯從欲幸忝留司官薄廩露飢釜尚愧遠祖丹西都多
巨公賢哲羅衣冠親炙挹高義朝夕陪清歡蒹葭倚白
玉蟻蛭對層巒肴羞屢陳列桃李煩簇鑽通作攢翰林壺

冰潔祕殿朱繩端遠識固莫測確論宜不刊立行皆表
的析理亡髀髓從容及議樂辯論生酒闌相固衆如堵
楚戰惴旁觀辭鋒奮銛利學海翻波瀾解帶拒班輸登
壇劫齊桓焚舟却魏武火牛快田單守義若據險持說

侔執干當仁不相讓食馬幾及肝聽者如餒人得味皆
珍餐折衷無聖師簡編闕且殘誰能置輕重愈見制作
難兩家難未解宜僚徒弄丸辨璞待炎火知松須歲寒
善教已乃孚大器久始完人雖不我合留俾後世看行
道匪彊聒賢蘊寧遽殫用舍繫所逢明哲固能安樂天
復知命願養資廣胖

歷陽彭衛字明微棄官養母築堂名曰壽燕取
壽老燕安之義得古人養志之道作詩以紀

實

養親不擇祿昔有仕為貧唯有席先疇足以供晨起
然舍祿位一志親耕耘既無王事監亦免賈用勤雞豚
畜以時梁稻盈倉囷處身但清約甘旨極鮮珍堂上垂
素髮含飴弄兒孫綵服不離膝終日常欣欣園中復構
室花竹圍四隣窻戶儼羅列開闔隨寒溫慈顏縱遊適
日涉不為頻雅當壽燕名安康保靈椿門多長者車間
可延嘉賓講道資朋友德譽日以新孝誠動金石豈獨

化鄉粉顯揚久益大聖世求忠臣

自警

憶昔為小官位卑職易營朋知喜其勤民口亦見稱中
間忝臺諫已覺言難行然賴識者恕尚謂無欺傾數年
忽遭遇用大過其能名虛稱不實任重力難勝具瞻不
可欺舉動招譏評士論固不與自知亦甚明祿厚難報
荅徒滋驕侈萌子孫忘艱難服用饒夸矜清白素風減
冗長浮費增親舊多責望厚薄貽怨憎貧賤勝富貴古

語信可憑請病蒙罷免方幸憂責輕俄復統一道撫民
帥邊兵寇狂適偃蹇民疲未蘇醒勝負繫司命休戚及
羣民細務委將佐大事稟朝廷所稟有違從委擇有不
精差失雖毫釐致敗或邛陵殞身何足道誤國玷家聲
可不常惕懼臨淵履春冰庶幾免危溢書此為心銘

自砭

人有好勝心當以善勝惡豈宜執人我與彼較彊弱所
得無毫釐所失已山嶽事過徒自悔駟馬追不却况臨

衰暮年事尤資審度如人行遠道日暮將憇泊遵途並
須慎勿使趣向錯逆境是吾師苦口多良藥豈止人難
欺將為鬼所囓有病在速治姑以自砭灼

次韻曼叔見寄

予生三十愚且蠢樂善自許人難雙前年杞城拜夫子
似處幽薮逢明缸交情期與道義久第愧蟻蛭臨崆峒
兵厨得酒不自飲攜挈過我盈尊缸追遊頗縱山水樂
涼風皓月臨溪缸長歌高嘯助清景徹曙未肯回解艘

別來節物皆一換秋風慄慄陵疎牕韓庵幽蓮墮紅粉
崔榭密竹森雲幢過從往往臻靜默兀坐終日如枯椿
得君新詩成杼軸目未窮紙心先降指摘萬象無不到
發慮百中如甘蓬摻情引思勉欲和畎溜豈合追湍瀧
念君懷道滯山邑誰者肉食居高龐龐高屋也方今明聖締
堂構采拔材幹恢鴻龐長松偃蹇卧澗谷梓匠誰與來
扶拄入登明堂柱九室氣象凜凜尊家邦復使天下貴
儒術頌聲千載長錚淙

同王弱翁宿廣化寺

能知真樂唯吾曹聲利外物誠無僥深山窮谷苟遂性
膚體不厭常枯焦况如佳景擅天巧會與仁友相追邀
龍門伊洛古今勝蒼巖翠壁雙峯崑疏鑿宛見神禹迹
懷襄既乂熙堯朝千龕萬宇變佛室鐘磬梵唄何喧囂
唐僧無畏號神雋當時聲勢尤翹翹開山撥壤盡奇秀
樓殿勢若風中飄高甍垂空插雲翼連閣跨路馳星橋
深沈神物潛擁護顯敞燕雀如矜驕揆奇選勝幸遲日

金
卷一
禪堂解榻眠清宵灘聲蕭蕭雜羣籟天真不啻聞咸韶
陵晨攜策度翠巘竹溪深處從僧招融融朝暉射巖谷
雜花爛漫紅欲燒令人即欲置萬累百年盡向遊中消
乃知神仙有密室我意已欲陵煙霄

龍門行

皇圖經野臨中天北有大河南陸渾陸渾之下伊之源
直走關塞侵山根此山不斷亘坤軸逆為汝海波濤翻
忽焉天意有不測鬴開峽口流如吞長波萬練卷空過

貫都會洛風霆奔崖岸相歛竦天闕此號鑿龍為禹門
石道盤紆入幽邃杉松隱映皆祇園下窺朝市但塵土
不與人世同囂喧天章閣老真相嗣詔委北陸嚴國藩
前騶驅弩聊盤桓憑高置酒臨巖軒是月嘉平臘將盡
春風料峭煙霾昏圭陰表日景漸正玉沙透水波先溫
杳杳端闈照宸極壯以嶠函周轆轤超然宴覽動咨歎
坐預國論慚冥頑乃知公旦卜洛意根本繫時亡與存
法宮在今宜有制上憲太微尊至尊乘杓布政朝萬玉

莫如洛宅當乾坤三陵氣象貫星野慶雲祚百雲來孫
宜唯設險御諸夏亦以捍患安元元為於可為事乃濟
器大重遷咸有言賤臣幽退冒及此願對上前圖籍論

梁貺之惠酒分餉張伯常朝議

貺之時為提刑

黃衣健卒肩乘壺口傳好語無緘書為言八使致新釀
赤泥翠籠來兵廚軫予官冷乏斟酌補助不足均羸餘
殷勤拜貺興不淺對月開滕露華滿金波瀉出紫玉瓶
珠光飛入琉璃醖獨酌雖甘少遺味懷友思賢動深意

走送城西詩酒家珠玉琅琅發清思李白一斗詩百篇
劉伶一石高七賢吏部興來卧甕邊賀公眼花井底眠
乃知醉鄉路安穩華胥有國無圻畛願君愷樂游其間
千秋萬歲歡難泯

和君實同年會作

詩酒相娛誠得策洛社當年有牛白况公同榜三四君
從宦天涯久相隔一朝把酒對春風餘花紅白猶堪摘
不鄙賤生年輩晚招延亦預尊前客清歡盡日信忘形

醉舞狂歌不知拍

和王微之赴韓持國燕集

潁川太守無羈束為政課卑纔第六里中耆舊六七翁
漸閒勇退皆高躅獨愧衰疲掌民社謾擁熊軒駕丹轂
身病何由安百姓才薄豈當尸厚祿巧匠居旁只坐觀
老手真能袖間縮唯有過從相愛心青松不肯更寒燠
韓公開宴坐高堂帳帟垂紅窻綺綠簾深不散玉爐香
夜長屢剪銅盤燭從容談笑雜笙歌爛漫有烝兼海陸

翩翩舞態學驚鴻
嘹唳龍吟出橫竹
與公進退晚相同
曾共憂勤參大麓
酒量從茲減壯年
豈復長鯨吞百谷
興來猶勉奉公歡
金尊未醕先頽玉
且同萬物樂時康
况慕諸君知止足

范忠宣集卷一

欽定四庫全書

范忠宣集卷二

宋 范純仁 撰

律詩

早行

夙駕冒輕寒身勞意自閒
鳴雞起遙墅殘月滿空山
水落灘沙白林稀落葉殷
東方上朝旭始免畏途難

遊嵩山與王弱翁聯句

靈境中天秀

辟疆

雄名古到今位尊朝列嶽

純仁

勢重

壓千岑靜鎖神仙宅

辟疆

高盤宇宙心孤棱標日月

純

仁

絕仞倚戈鐔彩棟靈祠邃

辟疆

層壇淨剝深民祈傳

覲語

純仁

國祀致君忱碑古苔生字

辟疆

堂虛畫蠹金

山呼曾薦壽

純仁

神降即為霖事怪塗山石

辟疆少室山下有啟

母

形端玉女砧峯巒排翠玉

純仁

灘瀨漱鳴琴蕙帳人

誰繼

辟疆

金泥迹可尋唐經藏寶妙

純仁

魏殿想鑾音

會善寺魏文帝離宮

雲作他方雨

辟疆

松連別院陰谷泉長浸斗

純仁山有七星泉

頂路欲捫參探穴魂潛動

辟疆

捫蘿力不禁

箕熊分蟻垤

純仁

伊洛認蹄涔鳥道樵夫去

辟疆

龍潭

驛使臨衆仙停羽駕

純仁頂有八仙壇

昔帝儼宸襟

山有玄宗御容

選

勝先看記

辟疆

乘危可作箴天門開四極

純仁山有東西二天門

樹品冠雙林

少林有則天三品松五品槐

靈藥看苗麝

辟疆

香醪挈

榼斟道宮庭不掃

純仁

學館突無黔

山有書院

壠麥風搖浪

辟疆

溪淙石聳簪雜花春爛漫

純仁

老木夜蕭森夕照

河光接

辟疆

晴嵐塔影侵深崖藏積雪

純仁

虛壑響幽

禽溪月寒澄霽

辟疆

巖烟暮香沈寺橋橫蟬蛩

純仁

禪

磬擊璆琳拂壁題新字

辟疆

逢僧舉舊吟疲驂何處解

純仁

高閣在崎嶇

辟疆

賈文元生日

時為侍中

寶運興王國真賢降帝庭乾坤深毓粹河嶽共儲靈慶
澤貽謀遠光華變世丁精心該古學夷步涉仙局虎變
騰彪蔚鵬飛絕竊冥畋占渭濱兆夢肖傳巖形姬旦興
周典桓榮授漢經四聰延啟沃百辟仰儀刑金節臨全
魏天聲震北溟仁恩宣雨露威令肅風霆玉壘兼前好

黃樞冠舊廳出封仍袞職開國直龍廷樂育先儒學憂
勤察訟圖談賓延白屋衛劍匣青萍體貌師臣貴功名
史筆青朝廷方倚重民物俟圖寧大厦容棲翼洪鐘謝
寸莛徒能繼興頌傾意祝遐齡

清輝閣

使寄東南重提封舊國雄江山歸漢節棟宇壓吳宮隱
几羣峯近穿梧一徑通竹陰搖檻翠橋影落溪紅響迸
荷心雨涼生水面風澄清多暇日尊酒喜時同

寒食日泛舟

合友逢佳節，攜尊泛碧流。
溪風銷酒力，煙樹入春愁。
羣鴨開波練，疏雲透月鉤。
平生懷古意，最羨五湖游。

贈師宰

君來寧素約，我至自殊因。
義重緣應合，心親見亦頻。
十年無齟齬，一遇有逡巡。
他日林邛去，須為白首親。

送別

小雨郊原淨，輕風生早涼。
歌聲激離思，酒力壯悲腸。
默

計去程遠預知宵夢長鄉闕足清賞一一寄詩章

和韓侍中上巳日會興慶池二首

波漲朱闌外山明綺席前
畫橈飛彩鷁紅旆照清漣
東閣隨開府佳賓盡謫仙
夕陽歸騎外芳草綠緜緜

故隄高柳綠毵毵花萼遺基映柳南
啼鳥解招遊客醉落花時有戲魚銜
舟移羅綺添春色山破雲烟出曉嵐
後會陪公應更樂行看廟勝掃祆欒

觀終南採冰

凝結自太古蒼崖潛閟深炎蒸當六月皎潔正千尋金
盃通珠液青蠅避玉碁焦勞方旰昃聊可沃君心

和江東運使韓子文見寄

歲寒君子意窮達見情均多謝江南信偏憐澤畔人明
珠驚照夜寒谷頓生春白首論交地須看管鮑親

和韓子文題王摩詰畫寒林

摩詰傳遺跡家藏久自奇高人不復見絕藝更誰師水
石生寒早煙雲結雨遲筆端窮造化聊可敵君詩

和毛維瞻郎中見寄

高賢煩出使妙東蓋從中紅旆臨江浦牙檣列岸楓頌
條蘇舊俗弔古訪遺宮令信遺文簡刑平獄戶空九重
天眷異千里物情通識面煙波際論心氣類同斷金捐
畛域倚玉愧蒿蓬別思知何似秋雲日夜東

晚菊

幽叢有佳色不必趣時開冷艷霜仍借清香蝶自來晚
芳情愈重醉賞目先回且伴芝蘭秀休嗟暮景頽

和謝師厚見寄

拙宦身何補謀生術不高履霜慚踐屐察俗念同袍獨鶴
寒先警哀猿夜更號淒風獵蘭蕙濃露濕蓬蒿故國荒三
徑南冠歎二毛使軺違右蜀賢里隔西豪吾友真時傑斯
文敵楚騷一官曾共守多難適聯遭諷詠餐忘味賡酬夜
費膏倦禽慵擇木涸鮒羨游濠交分窮彌篤相思夢亦勞
未能拋假綬何計理行篙老去情難展憂來首獨搔書勤
空繫鴈河廣詎容舠郡僻稀民政科繁屬吏曹飯粳炊玉

粒嘗蟹擘金螯治性親黃卷蠲愁仰白醪任真傾肺腑共
醉沃醕糟夕惕持新禁年凶減衆遨光陰徒汨汨懷抱慎
忉忉歸隱輸陶令參禪學李翱因君破蒙滯遣興彊含毫

和徐億郎中喜雪

君恩消稷沴

時霈恩
後三日

喜雪驗時和山峙崑兼閬江迷汜

與沱圃粧花闕巧林亞玉相摩邱壑平無異蕭蘭惠不
頗野催農務急客醉酒家多裂素思團扇吹毛想太阿
流風疑漢舞黃竹詠周歌煙冷漁村遠裘履獵騎過穀

登期歲稔人樂免天瘡會待晴宵賞寒光混月波

謝師厚寄同黃壻魯直唱和

忽得穰郊信翛然病魄醒懷賢心獨在感舊涕偏零南
斗占神劍西豪聚德星卧龍看復起失馬顧曾經冰玉
清相照芝蘭遠更馨麤官應念我白首候戎亭

和閻灝中秋賞月四首

中秋氣清肅况復在邊庭月吐孤輪迴天開六幕青輝
盈疑白晝明極掩常星此夕鄉關思胡笳莫細聽

張筵賞秋月簫鼓沸公庭光泛露逾白輪高天更青遮
藏三讓客牢落庶民星節去人隨老杯行我但聽
萬里邊城月清輝徹北庭沙侔霜霰白圃失蕙蘭青影
亂林篩玉光長隙透星南飛有歸鴈羨爾故先聽
浮雲收絕塞金鑑躍天庭但願冰輪瑩何煩桂影青溪
心如瀉練杯面若涵星曩昔開元曲何人可復聽

和聖美翟家原道中之作

曉烟浮水白晴日透霞紅屈曲嶺頭路蕭條旗脚風主

恩覃塞外賢業滿胷中始信人聲遠歡迎到處同

騎射

雄兒矜絕藝勇氣厭天驕振臂聯驅馬翻身仰射雕回
旋驚電電奔突出塵翳武備并文教均修是我朝

病起聞走馬宴同僚走筆戲呈席上

平日倦仍衰那堪更病羸賓僚聞燕集冠蓋阻追隨歌
筵宜嘉賞觥觴莫苦辭酒深緣意厚但看樂天詩

白公詩云

客知主意厚
分數隨口加

仲春寄二弟

春鴈來時節飛鳴各有行
弟兄俱遠宦秦楚久相望
尊席唯他士鶯花似故鄉
何時遂歸計共醉湫湖旁

酬羅道濟黃任道見寄

明時頻得罪出處愧朝行
音問通猶懶賡酬况敢望
諸公憐舊物遷客慣他鄉
懷抱隨新月遙依紫塞旁

僉判李太博靜勝軒二首

開軒納清景為吏似閒居
佳客迹頻到主人心自虛
琴

尊良有助時命固無如喧靜何能必中恬樂有餘
題軒名靜勝靜勝理何深自得歸根趣寧存較物心雜
花隨節候疊嶂互晴陰終日對圖畫應無塵慮侵

和君實微雨書懷韻

老畏風光速閒知日晷添惜春逢雨急病酒與愁兼採
藥蜂須溼銜泥燕嘴黏水聲淙曲沼花氣遞疎簾墜絮
柔鋪徑高梧翠倚簷清伊照牕碧少室插雲尖老蔓蛇
難蟄殘紅火不炎邀朋擬白社取友盡蒼髯饌具雖真

率賓儀去謹嚴主公紆繡袞詞伯玩書籤

君實方修書

陶冶

恩唯舊葭莩偶霑

君實聯姻

尊崇諸峻嶽高潔仰孤蟾社

稷勲無敵軻雄學不厭威聲傳異域名姓到窮閭賓主

均歡愛鄉閭化靜恬應憐孤客志粗守小官廉飢賴監

河粟貧無遺盜嫌清朝慚祿薄豐歲喜魚占識暗妨時

用心愚以古潛狂歌忘皓首醉眼怯青帘東閣容疎放

西都慰佇瞻壽詩常愧拙負弈固非謙久玷題評末深

蒙道義漸虛舟不復繫所向可無嫌

寄伯康君實

平生親友分偏向二難深但念相從樂應知別後心西
牕棊罷弈南園逕慵尋不奈懷賢意香醪獨滿斟

寄伯康君實

明月照分袂離魂增黯然禪公歸故里詞伯約新年松
竹荒三徑金蘭憶二賢向風無限意書札豈能宣

酬安之罷赴真率會

席上多佳客非君衆不怡詩詞雖有激誠意在相思朋

舊難踈間年齡合養願何如兩俱便欣出莫推辭

和安之謝伯康君實見訪

省壽當安逸炎蒸倦往還二難俱命駕三逕始開闌清
論應更僕新詩特解顏冥冥雙鴈序為叟下雲間

和文潞公席上

夏木清陰合公當雅燕開前軒鳴脆管密席列英才坐
久風逾快歡多日易頽膺門榮一顧孫閣愧常陪繞客
燒銀燭垂蓮醕玉杯醉歸應倒載遠勝習家回

和安之喜雨

驕陽逢密雨歲事可遙占灑砌涼堪喜通宵滴未嫌渠
淙鳴玉佩簷逗水精簾草木神俱王倉箱望已添炎蒸
俄盡滌秋意忽相兼稍霽循幽圃重尋晚筍尖

和范景仁蜀中寄牡丹圖

牡丹開蜀圃盈尺莫如今妍麗色殊衆栽培功信深矜
夸傳萬里圖寫費千金難就朱欄賞徒搖遠客心

同張伯常會君實南園

幽圃多清致人賢樂有餘游心同藝苑歸興若田廬畦
廣容栽藥門扃為著書築臺占嶽頂鑿沼灑伊渠庵倣
盧仝屋坊隣白傅居拂牀留倦客種竹蔭游魚弄水衣
襟溼遵流酒醖徐園翁名草木山鳥戲階除密席延商
皓高風邁漢疏城西老詩伯獨免醉登車

子駿君實約遊園遇雨而止

不盡陪從樂端居若絆羈雨方添草色寒更展花期舉
目紅芳阻搔頭素髮垂清尊難獨酌終日起相思

子華相公同遊趙令公園

相君行樂處繁盛故王家聲遠歌喧閣香濃酒泛花
瑰材扶廣厦美植列甘祖彊飲頻中聖回頭畏麴車

和王端太中牡丹

盈尺吐紅房春叢占上陽佳名過百品絕豔冠羣芳
嫩玉舒韶臉鮮霞避曉光楚妃殊衆色洛浦謝濃粧
露重珠如綴風回麝不香倦游稀愛賞得此浣愁腸

和王太中游洛述懷

乘春尋洛社不憚路岐長
盈畹花如笑傾都客若狂
山林多寂寞朝市太奔忙
不似安車老優游適四方

和君實陪潞公子華景仁宴集各一首

始終全盛美今古莫如公
華袞加朱紱安車撤畫熊
建儲宗社計破賊廟堂功
身退謀猷壯宜哉帝眷隆

再擁平陽節麟符守洛宮
禮賢多孺子交政得裴公
寬簡宜民化歡游與俗同行
看歸宰席致主詠南風

莎輶安車穩花簪醉帽紅
還鄉慰多士入洛訪諸公
覽

德如威鳳歸鞍若去鴻清規傳後學信道不談空
種竹盈軒翠栽花滿圃紅著書評百代守節避三公皎
潔升壇玉孤高漸陸鴻清名若嵩少萬仞亘長空

寄君實

西臺無吏責道義得親依過宿睽談益中懷已恨稀何
情堪久別無翼不能飛愚直相知少非公誰與歸

寄王不疑朝議

松筠宜歲晚冰雪照人清無限相從樂空添別後情官

期何日滿歸計未能成不起思予念翰君道眼明

喜雪

久暘逢臘雪酌酒動歡誠密勢迷城郭餘霏冒棟楹河
光平曳練嶽色遠堆瓊已報豐年瑞三登賀太平

和張坊州

詞場同際遇郡政接循良珠玉篇章妙芝蘭氣味長褒
言如袞繡雅意戒鷄梁老格松千尺清文水一塘賡
傳筆久降歎舉幡忙當宁神兼武開邊洮與湟再叨藩

寄重難報主恩滂憂職思承教何由到訟棠

和微之湖亭席上見贈

曾陪湖上醉

持國詩云兩君曠度皆吾黨紅燭迎舟盡醉還兩君謂微之與僕也

一別十

秋風向老相知少追歡舊德同花香來席上歌韻徹雲
中美酒盈尊綠新粧映燭紅清時宜共樂白雪和難工
便合歸休去荒田附郭東

壽慶州五弟

仲氏居青瑣予而各大州報君當盡節省已合回頭繼

述將何有榮華過即休相期知止足里社早同遊

寄二弟

一日如三歲離懷不可忘宦遊難會合衰老易悲傷原
上鵲飛急天邊鴈序長如何名利役白首遠相望

目盲

肝膽輸將竭因鍾兩目盲小冠希子夏令色恥邱明青
白何曾變紛華舊不爭幸回觀物志都作反身誠

謫居零陵

過盡瀟湘景冥行固不分烏羊殮可飫白酒飲能醺自
息登臨興因無出入勤靈妃曾鼓瑟信有尚堪聞

無書

患難人皆恤誰能絕信音寧忘問生死可是盡浮沈信
子情無矯知予咎自深嚴冬見松柏為有歲寒心

覆舟

始駭舟衝簸顛風振厚坤濤聲如壞屋雨勢若翻盆力
援煩舟子驚號閔稚孫全家脫魚腹應有未招魂

零陵重陽

衰年逢素節，盲卧桂江東。
應有登高會，其如摘堦翁。
捫杯難舉酒，嗅菊不知叢。
白首跼僧室，無煩落帽風。

零陵移居

不起移居念，全因廢兩眸。
門閭俱莫辨，隘陋亦何憂。
瞑鳥離巢遠，盲龜待木浮。
平生安穩少，蓋乏措身謀。

零陵憶弟妹

感秋懷弟妹，憔悴客瀟湘。
他日常星聚，

昔年兄姊妹五人常聚于許

衰年隔鴈行既盲難引望垂老易悲傷安得騎鴻鵠高
飛向汝傍

零陵寄三弟五弟二首

勿起還鄉念囊空不易居田租收素薄官俸奪無餘顏

困嘗求米立貧樂飯蔬

顏魯公為刑部尚書乞米於大
夫公孔子曰飯蔬食飲水曲肱

而枕之樂亦
在其中矣

朱門啟新第懸磬是吾廬

勿起還鄉念人多故與親舊通鄉里意皆仰俸餘緡望

縱諸家息情須一飯仲誰能悠久坐白眼絕朋賓

昔蔡氏女

凡孀居許下日費自廣皆里人所知須於安復隨郭
間置少生涯俟可倚如蒙命下漸就遷居或可耳

送貫之兄被召為御史三首

御史得言天下事吾兄清直副明揚方當旒宸勤開納
肯使江湖勇退藏賢者慮時心欲破仁人致主策須長
朝廷寬大生靈急只在忠臣振紀綱

憶昔先門陟諫垣正人風采動朝端家聲宜有琳琅器
兄職今我獬豸冠臺閣繼登時所貴忠賢得用古來難
浮榮未必吾儒志會把功名竹帛看

艱禍龍鍾百指存共全餘齒賴依仁鵠原方顧飛鳴急
烏府俄聞拔擢新此別宦遊須異地從今教撫更何人
他年莫負鄉關約明月扁舟白酒醇

孔寧極先生拜官二首

聖朝旌德向丘園紫詔頒恩到華門鄉老始知為善貴
競相廉讓教兒孫

先生操術本真儒進退恬然與道俱寵至不驚高節在
豈顧虛譽激凡愚

龍門山二首

雲擁樓臺雪擁川
親朋行望舉吟鞭
煙龕萬疊凌花霰
坐見金人變玉仙

松筠深處訪潛溪
唐相當年卜隱棲
畢竟主人歸不得
只教游客駐輪蹄

獨游石巖寄諸友

亂石巉空聳翠稜
攀蘿尋勝逐溪聲
愛山懷友情無限
日暮巖邊獨記名

寄香巖海仙人

穰鄧相逢已十年想懷風格鎮依然身同幻境融都寂
心得玄珠照自圓倚錫靜眠松下石煮茶閒試竹間泉
利名識盡情猶熟終羨吾師絕世緣

陳和叔游龍門先歸

玉峯環照碧伊寒樓閣參差四望間散騎從游皆故友
一川清景徹南山笑言迴出塵埃外心意都如物象閒
夫子官居慣追賞故饒諸客獨先還

和王弱翁白沙道中

共驅羸馬躡寒蕪
景色鮮明近洛都
出谷流泉春更綠
隔林幽鳥暮相呼
伊川舊賞疑朝夢
少室重看勝畫圖
從此便窮山水樂
相從應不厭崎嶇

龍門馬上望雪

山開曉色千峯玉
草映寒光萬點瓊
為我春游添景物
不教桃李獨鮮明

臨汝溫泉

山前陰火煮靈源昔日曾臨萬乘尊歷盡興亡只如此
不隨時俗變寒溫

與王弱翁游龍門

誰知造化擘巍峩千古伊流向此過四面寒松擁香剎
兩崖蒼石束寒波身閒愈覺良朋貴詩拙翻羞好景多
宜向諸方縱蕭散明朝望洛下長坡

許真君天誥

至人修練久能成此誥嘗聞降帝庭寶墨森森聳鸞鳳

訓詞一一在生靈既將道行蒙幽顯奚必仙蹤到杳冥
鶴駕雲輶非我覲祇期操履學真經

讀逸民傳寄孔寧極先生

漢法忠賢有不容遂持名節隱蒿蓬生靈莫見真儒效
爵祿多醕戰士功燕市終難沽美璞魚羅安得挂飛鴻
聖朝高士優游甚自有行藏繼祖風

和曼叔間書

夫子天資過我曹兩兼才德屬人豪不求近譽聲逾遠

能處卑官道益高豈止一同裁美錦直須萬俗被重袍
由來康濟吾儒事撫遍瘡痍莫厭勞

又和早行

拂曙征人各向方乍明林野更青蒼雲頭漏日開秋色
馬足翻沙破曉霜時事罕聞心愈靜故人不見恨空長
憐君素愛還鄉樂行役雖勞肯暫忘

循吏

王化由來起一同盡由守宰致平隆坐移風俗為能政

勤撫生靈是至忠四境肅清民害去一方和樂主恩通
吾皇有德真堯舜唯待諸君共理功

酷吏

虐吏天資害物深斯民無恥歎刑淫只憑豺虎貪殘意
肯順乾坤長養心骨肉盡將成怨府君親何以致薰琴
終逢族滅令人快智者為謀豈待箴

聞鍛

萬籟蕭然送夕曛鍛聲相應互成文高隨晚吹驚愁耳

清入霜空透暮雲始訝僧魚敲曉石靜如山木響秋斤
五兵若可為農器此韻千家不厭聞

和象之石磬

誰向西山選翠林中含太古自然音昔逢虞帝來祥鳳
今與陶家伴素琴清越乍敲修竹裏堅方真合哲人心
一鐫名姓將難朽千載知君道德深

送賈春卿宰尉氏

侍中之子

相君勲業冠朝端愛子猶居字俗官道德相傳家有法

功名善繼古為難
清平足使羣情化
談笑能令萬室安
千里遠途今日見
願當仁政勿盤桓

赴鄭郎中宴集

卧錦仙郎久卜居
滿床書史日康娛
邀朋欲走趨齋閣
不厭塵埃俗客無

范忠宣集卷二

欽定四庫全書

范忠宣集卷三

宋 范純仁 撰

律詩

寄辛化光

疎閒心跡久相親
一別江城兩見春
身若孤鴻長慕侶
道非尺蠖敢求伸
優游歲月空尸祿
明潤溪山不染塵
尊酒從容皆勝景
欠君來作席中賓

和吳君平游蔣山兼呈王安國二首

十年游宦阻朋從尊酒俄欣二友同單父能名推子賤
襄陽高節愛龐公六朝山色空陳迹十里松聲正晚風
聯騎追攀不知暮却嫌歸路入塵中

錢塘山色飽相從復此登臨景物同舊國池臺餘草碧
夕陽樓閣半山紅當時言笑如朝夢今日心顏盡老翁
終愛巖間坐禪客能將萬事付虛空

和呂獻可江口見贈

世閥俱承父祖風又叨宦契十年中棠陰代領諸侯印

棣萼更聯御史驄

先兄貫之已嘗與公同為御史

白首相期唯信道清

朝連貶為輸忠駕駘詎合參騏驎應合心能報主同

和呂獻可牡丹

去年仁政與春來真賞曾蒙醉目回紅旆已隨芝檢去
滿欄芳意為誰開

龍峯寺寄堯夫三首

呂誨

江頭五日艤輕舟欲去遲遲更自留目斷旌旗暮天闊
龍峯峯上倚層樓

去年同作南遷客今日更持刺史權
推挽試知民吏意無因談會向尊前

碧草茸茸照綠波暮春歸客興如何
滄浪應有清渾處羞見漁人鼓枻歌

和獻可龍峯寺見寄三首

驅車日日望行舟目斷風帆不可留
獨有召公遺愛地蒼山重疊滿晴樓

丹心自許醇明主百謫那能避貴權
此道方今誰復問

望公須向古人前

忠臣多快姦臣憤天意人情可奈何
安得臯夔能致主
早聞堯舜復賡歌

和獻可丙午二月六日別臺中僚友

感時情緒已難禁
况復懷賢恨愈深
鴉噪晚林催遠客
雲藏夕照弄輕陰
松筠自信凌霜操
葵藿長傾向日心
同志飄零山館寂
欲沽芳酒與誰斟

荆甘

品珍方重寄來難長憶東吳把酒看笠澤煙閑排錦樹
洞庭霜老摘金丸清香先透筠籠細甘液俄通玉齒寒
不學荔枝遺國恨曾煩驛使到長安

充墨

誰藝長松製作勤輕煤勻膩雜蘭薰中疑玄石無纖翳
外若靈犀有密紋溪石乍研浮紫翠蜀牋試寫落烟雲
會將點畫傳青簡千古忠邪為爾分

寄曼叔

他年嘗苦見君難每一相逢百倍歡
正值風煙遙化邑敢期塵土共麤官
夜談往往驚晨鼓樂飲時時解醉鞍
遊遍洛陽佳勝地須將歸興暫盤桓

和張統貫之同年

同榜同僚是別緣所存相近復相便
性情疎懶忘官檢襟抱平夷學古賢
仁者才謀當濟物吾曹名利久推天
須知白首相逢日不失初心始自全

和韓侍中遊興慶池席上

出郊尤喜雨初晴洗出川原物象明樓影半藏高柳外
池光遙與綠萍平鷗馴長近朱闌戲民樂爭隨畫隼行
主禮自忘台鼎貴芳尊盡日許同傾

和韓侍中垂蘿洞

勝遊今屬相君家臺榭高開碧水涯森聳綠梧常映日
縈紆寒溜曲穿花藤牽柔蔓垂長帶竹引新萌走蝥蛇
下吏不辭我醉弁却愁歸污繡茵車

和韓侍中上巳晚遊九曲池

前朝池閣盡塵埃登覽慚無弔古才
舊物祇餘蒼石在
斷牆曾識翠輿來
回環竹徑穿幽鳥
寂寞茅簷覆故臺
游客靜觀興廢迹
利名心息若寒灰

和韓侍中春陰馬上

三月芳菲欲暮天
可堪零雨晝連綿
潤催隴麥將籠節
寒阻春蠶起早眠
疎柳拂牆難結絮
嫩苔鋪砌已成錢
牡丹只待晴陽照
看吐新花一尺圓

次韻韓侍中遊興慶池

兩奉清歡到碧塘再遊無奈惜春光
莎勻古岸添新綠蝶遶殘花採舊香
佳木引陰交翡翠疎林迸筍補篔簹
從容賞遍西園景化國偏知日月長

和韓侍中登廣教院閣

兩陪千騎叩禪關每聽高吟解客顏
吉甫壯猶方北伐謝公高興在東山
僧軒深閉芳菲靜春晝初長鳥雀閒
游覽不知歸逕晚火城看逐隼旟還

和韓侍中同賞牡丹

秦地春光似洛陽牡丹名擅百花場
巧鍾絕豔羣芳後
高翦紅雲萬葉彊
露滿金盤看國色
風回綺席識天香
酒酣只欲盈簪戴
聊伴衰顏照玉觴

和孫曼叔北禪牡丹一蒂三花

三花駢蒂吐芳叢
曲盡東皇造化功
疑是神山仙子會
霞衣鼎立馭輕風

和韓侍中西禪牡丹

秦川花品似伊川
真賞應同上苑看
衆卉先收推國豔

五雲高吐學仙冠
烟苞添色資吟筆
露蘂霑香滿酒盤
勻壓春叢千萬朵
欲歸猶復遶朱欄

和韓侍中初夏游興慶池

池邊喜逐綵旗行
初夏亭臺照水明
筠籜乍開春後綠
林梢長帶雨來聲
新荷獵獵香風遠
深洞沈沈晝景清
珍重相君憂國意
宴游終亦念農耕

與張靖學士游華清宮雍帥錢子飛端明以詩

見寄次韻和

金節煌煌使輶華清勝絕許陪遊東來渭水晴光動
西望長安翠靄浮休羨青山供秀句好歸黃閣告嘉猷
憶公何處偏回首身在朝元最上頭

和吳仲庶龍圖西園海棠

丹葩翠葉競天濃蜂蝶翩翻弄暖風
濯雨正疑宮錦爛媚晴先奪曉霞紅
芳菲劍外從來勝歡賞天涯為爾同
却想鄉關足塵土只應能見畫圖中

贈眉陽致政程濬少卿

清節高風世所推
秋毫名宦肯徘徊
勇拋朝市無窮事
笑指林泉獨自來
吟榻未移溪月上
醉巾長拂野雲回
塵衣欲作登門客
几杖何妨許暫陪

和吳仲庶遊碑樓大慈二寺

錦城寒食最繁華
游騎翩翩雜鈿車
烟染翠行環郭柳
波搖紅影隔江花
長年已覺春如夢
遠客唯應醉是家
回首鄉關行樂地
風光正好路岐賒

和吳仲庶上已遊學射山

天涯春色蜀川多勝賞相從到薜蘿
遶郭烟蕪深似染隔林山鳥靜能歌
花邊密擁青絲蓋陌上輕馳白玉珂
察俗自知無遠術祇於民樂驗時和

和吳仲庶晚春遊海雲

東郊行樂冠西州古寺峯巒翠嶺頭
化俗文翁傳豈弟尋山謝傅繼風流
天涯尊酒欣相遇劍外三春得共遊
雅興直須窮勝賞年光難使隙駒留

又和暮春蠶市

古祠幽邃錦城隈千騎懼游宴席開盡日風光隨綵旆
一方民樂在春臺江頭佛寺藏深竹郊外人家蔭綠槐
已奉更書催別緒肯辭清賞屢追陪

寄臨邛致政常郎中

東海拋官勇退時邦人留止任牽衣三朝報國丹心盡
萬里還鄉一棹歸身向清閒添壽考德因潛隱更光輝
常思把酒親高議何日單車遂扣扉

寄持正都官按部嘉眉

使者觀風過晚春逢山應暫柅征輪雲埋雪嶺鋪銀界
日射金仙照碧津千里謳謠民足食萬家水竹地無塵
未能結駟相從去簿領空嗟絆此身

以眉州綠荔枝寄吳仲庶有詩次韻

嘉川荔子著芳名攜從歸鞍到錦城馳驛幸無唐日貢
甘芹聊致野人情丹砂結顆藏膏露赭殼為囊貯嫩瓊
京洛不須圖畫去得公佳句自分明

和仲庶江瀆避暑

古祠清燕敞虛堂喬木森森晝景長池面雨來荷助響
席間風細篆生香烏紗傾側朋簪樂翠縠翩翻舞袖長
牽俗自嗟行役去阻陪千騎醉瑤觴

將出蜀次仲庶送行詩韻叙別

遠客親仁豈素期况陪文酒復經時自慚拙宦多遷逐
每歎良朋易別離白首馮唐空已老清秋宋玉不勝悲
仰公早展經綸志百辟方今待允釐

寄李審言龍圖

英風一別幾經年尊酒相逢意灑然欲報重知慚國士
喜同清議屬真賢武侯方屈南陽卧蕭相曾封漢水邊
好及新春頒惠化行藏吾道合推天

醕張杲卿相公見招

先君同榜更何人教育偏蒙契義親孔氏繫匏暫滯迹
遼陽歸鶴羨閒身四朝盛事渾經眼千日濃醪好入脣
箕穎更無高放客只應梅柳為公春

和閻五秀才折海棠見贈

蜀國海棠春最妍
萬枝紅錦憶曾觀
鄉人折贈情尤重
肯與羣花一等看

宿州元太守北樓席上

七月高樓暑氣回
荷香細逐水風來
翠蛾細袖歌聲遠
綠野蒼山醉眼開
羈客秋懷追屈宋
主人交義繼陳雷
他年林下相逢去
詩酒何妨許重陪

和吳伯修洞霄宮

三朝勤瘁不謀身
今日官閒與道親
紆組還鄉宜最樂

居山得祿未全貧性情有暇窮真理門館無權少俗賓
會待收蹤歸畎畝就君同醉洞天春

和滕中舍見寄

蘄水分攜自昔時六年奔走困長岐人憐家世三朝舊
身在風波一葉危白髮星星驚歲月丹心皎皎仗朋知
林泉早晚歸休去廩祿無厭愧漏卮

和李敷察推即席感舊二首

相逢同榜盛當年喜復君來對此筵花下莫辭頻把酒

月中曾是共登仙
左遷還有麤官樂
晚達何妨秀句傳
得失已看如塞馬
苦心勞力亦徒然

一榜登科二十年
江城偶得共盤筵
鄭公雅喜中都職

鄭谷作都官
有詩自賀

梅福曾由邑吏仙

李兄自成
都拜幕官

白首相期情

契厚素風猶待子
孫傳狂歌醉舞形骸外
吾道從來況坦然

送宋大卿歸澠上

眉壽康寧位九卿
人間五福最難并
丹心報國冰霜潔

白首還家里社榮化日盡輸高世樂野雲應似出門情
淮淝美事傳千載何止孤風激後生

和孔宗翰郎中見寄

聖人流澤到真賢直節清名奕世傳惠政謳謠騰楚甸
醉吟風月滿江天嗟予濫典劭音翹農印歸老幾無坐客
種一得新詩消百慮黃梁未熟且安眠

和傅欽之見寄

至道潛心信有功目前超悟忽圓通三身不在諸塵外

萬象全歸一照中
念絕去來隨處樂
法無取舍自然空
護持雅屬當仁力
枉問麻陽懶鈍翁

和余周郎中見寄

宦遊從昔各艱難
方寸寧禁百慮千
憂患早催顏鬢老
風波回念骨毛寒
詞場久託平生契
酒席方陪此日歡
致主庇民嗟晚矣
只堪相約挂塵冠

章伯望郊居

獨愛高居遠市廛
簷楹軒豁對江天
門前一曲平橋水

舍側千畦附郭田
鷗鳥漸能親几杖
兒童應解愛林泉
朝廷方待忠賢急
莫厭京塵撲馬韉

和張挾侍郎見寄

戀德懷賢出禁城
片心長挂苦搖旌
留侯老棄人間事
白傅詩傳海外名
瀟灑琴尊資上壽
太平風月屬高情
已知世故無關慮
佳句猶煩訓後生

金陵懷古二首

天兵從昔度長橋
四海干戈一戰銷
江叟豈能知帝力

醉憑漁艇亢秋潮

六朝文物今何在千里江山自宛然
英武南征無殺伐至今樵牧尚能傳

和元子發學士見寄

二紀區區困宦遊相逢莫訝鬢先秋
清時無補身空老往事難追涕旋流
舉世交情憐我少經旬行色為君留
何時歸去江湖上風月同尋范蠡舟

和王著作見寄

疎慵齋閣晝常扃，忽喜君來病魄醒。
走訪禪山諸洞穴，

同祈雨褒禪山
百里一日往返

醉吟詞客舊林亭。

懷賢亭乃張
水部舊宅

十年多

難頭俱白，四友相看眼共青。
別後新詩收滿軸，芝蘭雖遠有餘馨。

和李敷重九席上遣興

謫居閒僻少朋游，珍重征帆肯暫收。
多難共驚霜遶鬢，重陽還喜菊盈甌。
樓前雨洗千山翠，天際江橫萬里秋。
節物相催人漸老，此身何日得歸休。

和謝師厚見寄

地僻官廳儔侶稀鄉關回首隔殘暉
鬢霜楚霧人空老水落紅沙鴈自歸
往事尋思都似夢素期乖失謾知非
東風送雨長西去心逐輕雲日夜飛

中秋賞月

碧落無雲玉鑑飛淨中毫髮了能窺
光隨酒蟻斟銀槥彩瑩歌人發
瓠犀露重已從巾角墊輪傾欲把斗杓攜
醉狂直好探蟾窟安得陵空萬仞梯

和耿憲見贈

仕途名迹本幽遐
諫省俄登忝世家
恩戴邛山宜盡瘁
言闕社稷敢歌邪
獻芹寧識羔羊美
抱甕徒為智士嗟
君子一言華袞重
此身被服愧無涯

和徐郎中柏枝甘露

素液濃甘勝醴飴
偏零翠柏瑞明時
何如溥作豐年澤
萬物涵濡被福釐

和曹職方至日

宦遊將老愧蓬飄逢節他鄉倍寂寥世網縈身難自解
鬢霜凝鑑不重消隨陽鳴鴈聞初急向日丹楓惜半凋
飽暖全家盡君賜忍看編戶獨無聊

和耿憲秘校喜雨

愆陽六月氣仍驕多士身勞思亦焦膏澤俄隨恩詔溥
螟蝗半逐野雲飄歲時敢望家聊給賦歛能供政有條
鑿井耕田忘帝力何當鼓腹播民謠

題李子高虞部園四首

今時難得是高人里社因君俗愈醇松竹漸成風月好
只應終日聽韶鈞

修鍊工夫合自然河車潛引玉池泉老君道德人難識
復見雲孫達二篇

全家歸隱似前賢碧酒醇醲白蟹鮮心欲生民常富壽
高歌會樂太平年

不教外物翳襟懷明合蒼龜亦信哉駕蹇自慚無駿骨
謾勞伯樂品題來

和曹演甫中秋見懷

去年對月憶良朋
今夕誰同塞上情
華髮蒼顏人易老
賞心樂事古難并
戍樓笛響千山迥
沙漠霜寒萬里明
半夜歸鴻飛不斷
好將幽夢到淮城

和閻灝屯田五十歲元日感懷

與予同榜同甲

君緣直道阻橫飛
我愧無才振國威
同榜同僚忝契分
使秦使蜀重親依
裹糧衣帛身空老
學易知天志尚違
白首相期惟信義
世情徒是亦徒非

和吳仲舉通判見贈

侍行曾見羽書飛，獨鶴歸遼想令威。
三紀家聲幾泯泯，重來民俗尚依依。
脫身負擔誠多幸，屏迹山林願正違。
主諾已繫賢者助，第承先業愧才非。

塞下追憶烏江之會寄李誠之待制

主人忘倦客忘歸，長憶江邊惜別時。
日下青山猶促席，風衝畫鷁正醺詩。
盤堆白玉鱸腴美，手擘黃金蟹殼肥。
今日相思孤戍裏，塵沙滿眼鬢垂絲。

和閻灝重陽見贈二首

秋懷多感怯清笳判向西風醉帽斜塞上星霜人易老
幕中談笑客偏嘉金英浮酒稠於蟻丹葉粧林遠似花
身健幾逢佳節在登臨尤更惜年華

登高宜不負良期須信時光似隙暉碧穗引鑪香滿坐
黃金遶席菊成圍物華旋逐鳴飈減客思空隨去鴈飛
莫訝尊前偏醉倒醉鄉纔到便忘歸

和曹演甫秋日見寄

九日天邊倚戍樓他年江國想陪遊
鱸膾滑與萸絲薦
菊藥香隨酒蟻浮
別後星霜催老態
秋來顏鬢染鄉愁
懷賢感舊情難盡
待向東西丐一州

王聖美太丞奉使西來喜而有贈

賢愚雖間契稠重
科籍同兼甲子同
省斂劭農明主意
靈威問俗古人風
陽和煦物先春到
膏澤隨車大旱中
感舊知恩誰最篤
塞垣憔悴一衰翁

和聖美觀騎士翫坡

翩翩飛鞚發雲間壯士旁觀亦汗顏勢若投丸當峻坂
影如掣電下空山漢兵神速從天落楚騎颯馳取將還
聖主恩深懷擴俗謾教角逐向安閒

和聖美壁間題

胡懾天威自走藏腐儒焉用合還鄉駑駘戀主心終在
鼯鼠營身技不長晚歲胷襟成濩落故山林壑謾青蒼
進趨無術歸無計聊得君詩浣肺腸

和聖美三岔鋪留題

今日天涯同一笑當年澤畔共長吟

公謫上元予謫還
歷陽封畛相接

朝未復中臺職報主長存國士心

蕃舞

低昂坐作疾如風羌管夸歌唱和同應為降胡能蹈拊
不妨全活向軍中

觀疆人翦坡

蟻分突騎向高岑馳下危塗萬丈深
獷俗輕生唯鬪險
垂堂寧復戒千金

和聖美華池感事

聖主憂勤百職修，忠臣那復作身謀。
遐方民力資周度，晚歲人情樂小休。
郭震能僵烏質脛，陳湯解斬郅支頭。
知賢獨恨官疎遠，珠璧何時免暗投。


寄陳述古賓客萬璉郎中二首

智淺才疎合竄流，生逢堯舜忍空休。
猶慙世舊垂青眼，未報君恩已白頭。
貴老何由操几杖，愛賢曾是繼箕裘。

先文正己與
二公相知

新春遙祝增眉壽，阻向賓筵跪一甌。

欣欣萬物占芳春對景那知放逐身粗守素風諳左宦
擬投白社愧高人漢疏蚤命東門駕器之致仕已久商老方為
少海賓空辱忘年微報稱浪疇佳唱恃心親



范忠宣集卷三